

GABRIELIS PHAERNI  
CREMONENSIS.

*Illustres animæ quarum miro ordine mores  
Et clara Iovius facta chartis tradidit,  
Seu uos imperijs in pace uigentibus auctæ  
Seu bellica fuistis arte prædita.  
Quisquis inest uobis post fata nouissima sensus,  
Si, quæ hic aguntur, scire uos credi licet,  
Latitia certe haud modica gestire, nouoque  
Debetis alacres exilire gaudio,  
Quum reuirescentem longo post tempore famam  
Uestram, atque laudes excitatas cernitis  
Facundi calamo Iouij, quem nostra prope unum  
Aetas, uetustis inserit scriptoribus.  
Quare etiam atque etiam, uos huic debere fatendum est,  
Aeterna per quem uestra uiuet gloria.  
Nec minus insigni debetis plurima COSMO  
Cui lata pulchræ paret ora Etruriæ,  
Hæc qui uestrorum iuuenis generosus honorum  
Monumenta, formis iussit excudi aeneis,  
Ille unus lapsas sæclis uergentibus artes  
Et litterarum studia neglecta erigit,  
Ille fouet uates, illi pia carmina cura,  
Et restituta in pristinum sapientia,  
Et quæ sidereos linquens Astræa recessus  
Sub hoc reuisit Principe humanum genus.  
Utque salutiferum radianti lumine sidus  
Seu Ueneris almæ, siue supremi Iouis  
Tristia felici leuat exoriens aspectu  
Astra, atque latos undique euentus ciet,  
Non morbi, non bella uigent, maria alta quiescunt  
Et aucta largis terra ridet frugibus;  
Talis honorato Medicum de sanguine COSMVS  
Orbi serenum illuxit Etrusco iubar,  
Sustulit incestas pœnis ultricibus artes  
Mores probrosos pepulit, induxit bonos,  
Virtuti pretium, ingenijs honor additus, unum  
quenque ad decora studia & artes allicit.  
Pax securæ uiget, iustum dominatur & æquum,  
Procul insolentes exulant iniuriæ,  
Macte ista uirtute animi clarissime Princeps  
Futura nunquam te silebunt sæcula.*